

Տ. ԹԱՂԵՈՍ ՎԱՐԴԱՊԵՏ ԶԻՐԵԿՅԱՆՑԻ ՔԱՐՈՉԸ՝ ԽՈՍՎԱԾ Ս. ԷԶՄԻԱԾՍԻ ՍՐԲՈՑ ՅՐԵՇՏԱԿԱՊԵՏԱՅ ԵԿԵՂԵՑՈՒՄ՝ «ՍՐԲՈՑ ՅՐԵՇՏԱԿԱՊԵՏԱՅՆ՝ ՊԱՐԻԻԷԼԻ, ՄԻՔԱՅԷԼԻ ԵՒ ԱՄԵՆԱՅՆ ԵՐԿՆԱՅԻՆ ԶՕՐԱՅՆ» ՏՈՆԻ ԱՌԻԹՈՎ ՍԱՏՈՒՅՎԱԾ Ս. ՊԱՏԱՐԱԳԻՆ

(11 նոյեմբերի 2017 թ.)

Յանուն Հօր եւ Որդւոյ եւ Հոգւոյն Սրբոյ. ամէն:

«Նա իր հրեշտակներին հոգիներ դարձրեց
եւ իր ծառաներին՝ կիզիչ հուր»
(Եբր. Ա. 7, հմմտ. Սաղմ. ԺԳ. 4):

Սիրելի՛ Հավատացյալներ,

Այսօր երկնքի արքայութեան «փոքրիկ հոտը» ձեր խուռներամ բազմութեամբ ժողովվել է այս նորակառույց Սրբոց Հրեշտակապետաց գողտրիկ եկեղեցում՝ նշելու «Սրբոց Հրեշտակապետացն՝ Գաբրիէլի եւ Միքայէլի եւ ամենայն երկնային զօրացն» տոնը:

Օրվա ընթերցվածից իմացանք, որ Աստված Իր հրեշտակներին ստեղծում է որպէս «հոգի եւ կիզիչ հուր»՝ երազաթուիչ թեւածելու եւ փայլածելու երկնային անծայրածիր տարածքներով, պահպանելու եւ այցելելու երկիր մոլորակի ընտրյալ արարածներին: Իսկ ավելի ետ գնալով՝ կտեսնենք, որ Աստվածաշնչի առաջին իսկ համարը հռչակում է՝ «Ի սկզբանե Աստված ստեղծեց երկինքն ու երկիրը», այսինք՝ նախ երկինքը, ապա՝ երկիրը: Եկեղեցու հայրերը մեկնում են, որ «երկինքը» խորհրդանշում է նաեւ հրեշտակաց ինը դասերի՝ երկնաբնականների արարումը: Ուրեմն, կարող ենք ասել, որ երկինքը լուսավորվել էր նախքան Աստված կարտաբերեր Իր Բանը՝ «Թող լինի լույս» (Ծննդ. Ա. 3), նախքան կստեղծեր «երկու մեծ լուսատուները»՝ արեւն ու լուսինը՝ «լուսավորելու համար երկիրը» (Ծննդ. Ա. 14, 15, 17), եւ երկինքն ու երկիրը լի էին Սերովբեների եւ Քերովբեների երգակցութեան հնչյուններով ու պարակցութեան ցնծություններով, Լուսեղենների եւ Հրակերպյանների՝ Սուրբ Երրորդութեան ու «Փառաց Թագավորի եւ Զորութեանների Տիրոջ» հրեշտակաբարբառ երեքսրբյան օրհնաբանութեաններով ու փառաբանութեաններով...

Սակայն Գաբրիել եւ Միքայել հրեշտակապետների «Երկնային քահանայապետության» հարազվարճ բերկրության այս ներդաշնակությունը պետք է խախտվեր տիեզերաբանական մի աղետալի իրադարձությամբ: Եսայու մարգարեության ԺԴ. գլխի խորհրդաբանությունը հայտնում է, որ արարյալ առաջին հրեշտակը՝ Արուսյակը, ըմբոստանում է Աստծու դեմ եւ անկում երկնքից: Իսկ Աստվածաշնչի վերջին գրքի՝ Հովհաննու հրեշտակաբանական Հայտնության Ը.-Թ. գլուխների խորհրդաբանությունը հավելում է, որ անկյալ առաջին հրեշտակին հետեւում է հրեշտակների մեկ երրորդը, եւ այստեղից էլ սկիզբ է առնում չար ու բարի հրեշտակների միջեւ տիեզերական պատերազմը:

Սիրելի՛ հավատացյալներ, Օրհնության շարականում երգում ենք. «Լցրե՛ք անկյալ ապստամբ թշնամու տեղերը, որոնք երկնքից վայր անկան»: Այս երեւույթը աստվածաբանորեն կոչվում է «հրեշտականամանություն», «հրեշտակակերպություն», երբ Քրիստոսի Մարտնչող եկեղեցու սրբերը գալիս են լրացնելու անկյալ հրեշտակների դատարկ տեղերը երկնային Հաղթանակած եկեղեցում, եւ հրեշտակաց ինը դասերի վրա ավելանում է «մարդ-հրեշտակային» տասներորդ դասը:

Նախանցյալ տարի՝ Մեծ Եղեռնի հարյուրամյակի դարադարձին, Հայ Եկեղեցին սրբադասեց մեր բյուր-բյուրավոր նահատակներին, որոնք առավելով լեցրեցին այդ թափուր տեղերը հրեշտակաց օթեւաններում: Եվ եթե մինչ այս մենք էինք հոգեհանգստյան պաշտոն մատուցում նրանց համար, ապա այսօր այդ անհայտից հայտնի դարձած սրբերը անդադար բարեխոսում են մեր մեղավոր հոգիների փրկության եւ մարդ-հրեշտակային տասներորդ դասին անդամագրության համար:

Սիրելի՛ հավատացյալներ, այդ դատարկ տեղերը նաեւ ձեզ են սպասում, ձեր միջից անհայտ բազմաթիվ սրբեր պետք է հայտնի դառնան, բազմաթիվ «վերջիններ պետք է առաջիններ լինեն» (հմնր. Մատթ. ԺԺ. 30), դուք բոլորդ եւ յուրաքանչյուրդ եք կոչված սրբության, որպեսզի դուք էլ, երբ ձեր ժամն ու հերթը հասնի, դառնաք մեղավոր մարդկության անմոռնչ բարեխոսները...

Թող Աստված Սուրբ Հոգու շնորհներով արժանի համարի մեզ բոլորիս «ի խորոց սրտի» աղոթելու Իր Միածին Որդուն՝ Ս. Գրիգոր Նարեկացու հետ միախոհ եւ միախորհուրդ. «Դարձի՛ր դեպի ինձ եւ ողորմիր/ անկարոտ Աստված/ Դու, որ այնքան ծարավի ես/ ու պապակ իմ փրկությանը/ Որ մինչեւ անգամ երկնային անմահ/ եւ օրհնաբանող զվարթունքներին/ պաշտոն հանձնեցիր/ Հանուն մարդկության փրկության կարգված/ Քա-

հանաներ եւ քավհապետներ հավիտենական/ ի դիմաց մեր՝ երկրակենցաղ-
ներին,/ Թշվառ լքյալիս հաշտության համար/ պաղատելու քեզ մշտնջե-
նապես,-/ «Ողորմի՛ր Երուսաղեմին». որը լուսավոր/ մի խորհուրդ ունի,/ Թե
այս երկրավոր Երուսաղեմի/ սույն օրինակով խնդրում են նրանք,/ Քո
մեծ հայտնությամբ/ Եվ քեզ կցորդված մարդկանցով՝ ընկած հրեշտակ-
ների դատարկը լցնել» (Մարյան Ողբերգության, ԼԴ., Թ.):

Շնորհք սեր եւ խաղաղութիւն Տեառն մերոյ Յիսուսի Քրիստոսի եղիցի ընդ
ձեզ եւ ընդ ամենեսեանդ. ամէն:

